

XAM PHAJ

Xam Phaj, Zaj 1 thiab 6

Mais Xes txheeb cov His Xas Lais. 1 : 1 - 4 + 17 - 19.

1 1 HUAB TAIS hais lus rau Mais Xes nyob hauv lub hav suab puam Xis Nais, hauv lub Tsev Tsam Phooj Sib Ntsib. Yog xyoo ob txij hnub lawv tawm Hais Nkws Tos teb los, thaum lub ob hlis xiab ib . HUAB TAIS hais tias :

2 "Koj txheeb tsoom tub ki His Xas Lais, txheeb raws cov xeem thiab cov yim neeg, txheeb cov txiv neej cov npe, suav ib lub npe zuj zus. 3 As Loos neb yuav sau cov tub His Xas Lais muaj nees nkaum xyoo rov saud tas huv si, uas txawj mus ntaus rog cov npe, muab los ua tej pab raws lawv txoj kev kawm ua tub rog. 4 Neb yuav xaiv ib lub xeem ib tug txiv neej pab neb, yuav xaiv ib tug uas yog tus txiv tsev.

17 Mais Xes thiab As Loos nkawd hu cov txiv neej uas muaj npe tuaj. 18 Ces nkawd hu tas tsoom sid tuaj sib sau lub ob hlis, hnub xiab ib. Cov His Xas Lais sib zeem ua kwv tij raws lawv lub xeem thiab lawv tsev neeg. Lawv sau cov txiv neej muaj nees nkaum xyoo rov saud cov npe, pib sau ib leeg zuj zus. 19 Mais Xes txheeb lawv cov npe nyob hauv lub hav suab puam Xis Nais, raws li HUAB TAIS kom nws ua.

Kab ke fij yeem nas xis las. 6 : 1 - 12.

6 1 HUAB TAIS hais rau Mais Xes hais tias :

2 "Koj hais rau tsoom tub ki His Xas Lais tias : Yog ib tug txiv neej los ib tug poj niam xav pauj ib lub yeem, hu ua lub yeem nas xis las, uas nws cog lus rov

muab nws qee rau HUAB TAIS, 3 mas nws yuav tsum yoo cawv, tsis haus ib Yam uas xyaw cawv li. Nws yuav tsis txhob haus cawv qaub, tsis txhob haus kua txiv cawv, tsis noj cov txiv cawv de tshiab los txiv cawv qhuav li. 4 Thaum nws nyob hauv lub caij pauj yeem nas xis las ntawd mas nws yuav tsis txhob noj ib Yam uas los ntawm txiv cawv los, tsis hais kua los phuas li. 5 Tas lub caij nws pauj yeem ntawd, txawm yuav ntev li cas los nws yuav tsis txhob chais plaub hau. Lub caij ntawd nws yog ib tug neeg qee rau HUAB TAIS, mas nws yuav tsum cia plaub hau ntev. 6 Tas lub caij ntawd, nws yuav tsis txhob txav mus ti ib tug tuag li. 7 Txawm yog nws txiv tuag, los nws niam tuag, los nws tus kwv tus tij tuag, los tus muam tuag, mas nws yuav tsis txav ze, vim yuav tsis txhob cia nws tsis huv, vim nws yog ib tug neeg qee rau nws tus Tswv Ntuj lawm. 8 Tas lub sij hawm nws pauj lub yeem nas xis las, nws rov muab nws qee rau HUAB TAIS. 9 Yog muaj ib tug neeg nyob nyob cia li tuag tam sim ntawd ze nws, mas tus tuag ntawd tsuas nws cov plaub hau tsis huv lawm, ces nws yuav tsum chais plaub hau dawb paug hnub uas nws ua cov kab ke ntxuav huv. Hnub nws chais nws cov plaub hau mas yog hnub xya.

10 Hnub yim, nws yuav tsum nqa ob tug nquab, hom soob los hom loj kuj tau, tuaj rau tus leej choj ntawm lub qhov rooj Tsev Tsam Phooj Sib Ntsib. 11 Leej choj yuav muab ib tug nquab ua kab ke txi Ntuj ntxuav txhaum, hos muab ib tug ua kab ke hlawv txi Ntuj. Ua li ntawd tas, leej choj mam li ua cov kab ke ntxuav qhov tsis huv uas nws tau kis ntawm tus tuag los. Hnub ntawd nws yuav ua kab

ke muab nws lub taub hau fij rau Ntuj. 12 Nws kuj yuav ua cov kab ke muab nws rov fij rau HUAB TAIS dua, ces nws rov nyob hauv lub caij pauj yeem nas xis las dua kom puv tsug. Nws yuav coj ib tug yaj muaj ib xyoos tuaj ua kab ke txi Ntuj them txim txhaum. Tsis txhob suav lub caij nws xub pib pauj yeem los lawd, vim nws cov plaub hau tau tsuas tsis huv lawm.

Zaj foom hmoov zoo.

6 : 22 - 27.

22 HUAB TAIS hais cov lus no rau Mais Xes :

23 "Koj hais lus rau As Loos thiab nws cov tub, koj hais rau lawv tias : Nej yuav foom hmoov zoo rau cov His Xas Lais, nej yuav foom lus zoo li no rau lawv :

24 'Thov kom HUAB TAIS foom hmoov zoo rau koj thiab pov hwm koj ! 25 Thov kom HUAB TAIS lub ntsej muag ci ntsa iab rau saum koj thiab pub nws lub txiaj lub ntsim rau koj ! 26 Thov kom HUAB

TAIS qhib nws lub ntsej muag rau koj pom thiab pub kev thaj yeeb rau koj !

27 Koj qhia kom lawv siv kuv lub npe rau saum cov His Xas Lais li no, ces kuv yuav foom hmoov zoo rau lawv."

Kab ke tsa cov Les Vis ua lub xeem tsob hwb HUAB TAIS. 8 : 5 - 11.

8 5 HUAB TAIS hais rau Mais Xes
hais tias:

6 "Koj yuav hu cov Les Vis hauv tsoom His Xas Lais tuaj, koj yuav ua cov kab ke ntxuav lawv. 7 Koj ua kab ke ntxuav lawv zoo li no : Koj yuav tsuag dej ntshiab rau saum lawv, lawv yuav chais lawv ib ce thoob plaws thiab lawv yuav ntxhua lawv tej ris tsho, ces lawv yuav

huv. 8 Lawv yuav tua ib tug heev nyuj txi Ntuj, thiab lawv yuav txi ib co ncuav mov xyaw roj. Koj tseem yuav tua ib tug heev nyuj los ua cov kab ke ntxuav txhaum. 9 Ces koj coj cov Les Vis los nyob ntawm lub Tsev Tsam Phooj Sib Ntsib, koj nqua hu tsoom His Xas Lais sawv daws tuaj. 10 Koj kom cov Les Vis los sawv ntawm HUAB TAIS xub ntiag, ces tsoom tub ki His Xas Lais yuav tsa tes rau saum lawv. 11 As Loos muab cov Les Vis fij rau Ntuj, nws tsa nws ob txhais tes ua lub ntim cev cov Les Vis rau HUAB TAIS. Nws sawv tas tsoom His Xas Lais chaw ua qhov ntawd. Ces cov Les Vis thiaj li yog ib co tub qee cia tsob hwb HUAB TAIS.

Tsoom His Xas Lais yws yws.

11 : 4 - 9.

11 4 Tsoom pej xeem thiab tas haiv neeg sawv daws tshaib plab. Cov His Xas Lais rov qab quaj quaj yws yws tias :

"Leej twg yuav muab nqaij rau peb noj ? 5 Ua cas peb yuav nco tej nqaij ntses uas peb tau noj dawb nyob Hais Nkws Tos teb ua luaj ! Nco tej dib ntsuab, tej dib pag, tej zaub, tej dos tej qij tib si ! 6 Nyem no ces peb nyob yoo tshaib yoo nqhis, peb qaug zog zuj zus, peb ntsia qhov twg los tsuas pom mov Mas Nas xwb !"

7 Cov Mas Nas ntawd ua tej lub li noob zaub txhwba qiba, khov ntseeg nkaws zoo li ib cov txab ntoo. 8 Tsoom pej xeem niaj hnub mus ncig khaws Mas Nas los noj, lawv xuas zeb zom thiab muab tuav hauv qhov cos, ces lawv muab hau rau hauv lauj kaub, lawv mam puab ua ncuav noj. Cov ncuav Mas Nas qab li ncuav nplej xyaw roj. 9 Hmo ntuj, thaum lwg

poob los, cov Mas Nas kuj nrog lwg poob los thiab.

Mais Xes thov nqaij rau cov His Xas Lais. 11 : 10 - 15.

10 Mais Xes hnov tsoom pej xeem quaj quaj, nyias quaj ntawm nyias lub qhov rooj tsev tsam phooj. Ces HUAB TAIS npau taws heev, hos Mais Xes ntxhov siab kawg. 11 Mais Xes hais rau HUAB TAIS tias :

"Vim li cas koj ua phem rau koj tus tub txib ? Vim li cas koj saib kuv tsis xis koj siab, koj thiaj muab lub nra uas coj haiv neeg no rau kuv ris ? 12 Puas yog kuv tau xeeb haiv neeg no, thiab tau yug haiv neeg no ? Ua cas koj thiaj hais rau kuv tias: 'koj puag haiv neeg no rau ntawm koj xub ntiag xws li leej niam pub mis puag nws tus me nyuam noj mis ? Koj puag lawv mus kom txog lub teb chaws uas kuv cog lus muab rau lawv cov yawg koob ?' 13 Kuv yuav nrhiav nqaij qhov twg rau haiv neeg no noj ? Lawv ua kuv ntxhov siab kawg vim lawv quaj tsis tseg rau kuv tias 'Koj muab nqaij rau peb noj !' 14 Kuv ib leeg ris tsis taus haiv neeg no, hnyav kuv dhau. 15 Yog koj ua nyuaj kuv li no, thov koj muab kuv tua kom tuag zoo dua ! Ab ! kheev lam koj hlub kuv mas, kuv yuav tsis pom txoj kev txom nyem no ntxiv lawm !"

Huab Tais lub Tswv Yim pab lawv ua yaj saub. 11 : 24 - 30.

24 Mais Xes tawm mus hais HUAB TAIS cov lus qhia rau tsoom pej xeem. Nws hu xya caum leej txwj laus tuaj sib sau nyob ntawm lub Tsev Tsam Phooj, 25 HUAB TAIS nqes los nyob saum twv huab. Mais Xes nrog nws tham, ces

Tswv Ntuj tso nws lub Tswv Yim nqes los tsaws saum xya caum leej txwj laus ntawd. Thaum Tswv Ntuj lub Tswv Yim nyob saum lawv, mas lawv ua yaj saub thaum ntawd, tiam sis lawv tsis rov qab ua ntxiv lawm.

26 Muaj ob tug txiv neej nyob hauv yeej, ib tug hu ua Es Das, ib tug hu ua Mes Das, Tswv Ntuj lub Tswv Yim los nyob saum nkawd thiab, txawm tias nkawd tsis tuaj nyob ntawm lub Tsev Tsam Phooj, thiab nkawd tsis nrog lawv muaj npe. Tsis kav nkawd pib ua yaj saub nyob hauv lub yeej. 27 Ib tug tub hluas khiav tuaj hais qhia Mais Xes tias : "Es Das thiab Mes Das nkawd ua yaj saub nyob hauv yeej lawm."

28 Yos Xuas uas yog Nuv tus tub, nws ib txwm pab Mais Xes txij thaum yau los, nws teb ntua hais tias :

"Leej Hlob Mais Xes, koj tsis txhob pub nkawd ua li ntawd !"

29 Mais Xes teb tias :

"Koj puas sawv kuv chaw khib ? Ntawm kuv, mas kuv xav kom tas HUAB TAIS haiv neeg txawj ua yaj saub, kom HUAB TAIS pub nws lub Tswv Yim rau lawv !"

30 Ces Mais Xes rov mus hauv lub yeej, cov txwj laus nrog nws mus.

Cov yij. 11 : 31 - 35.

31 HUAB TAIS ua ib nthwv cua sawv tom dej hiav txwv tuaj, nthwv cua tshuab tau ib co yij los rau ntawm lub yeej. Cua tshuab yij ntawd kawg los, mus ib hnub ke deb ntawm lub yeej los tseem muaj, hos tuab npaum li ob tshim saum npoo av.

32 Tsoom pej xeem tsis pw li, lawv nyob hnub ntawd ib hnub, hmo ntawd ib hmos thiab tag kid ib hnub, lawv ntes cov yij ntawd cia : tus ntes tau tsawg yog kaum tawb. Ces lawv coj los ziab ncig lub yeej.

33 Lawv noj cov nqaij ntawd. Lawv nyuam qhuav ntxo ntawm hniav xwb, tsis tau xo hauv qhov ncauj, HUAB TAIS twb npau taws rau lawv lawm. HUAB TAIS ua kom lawv raug ib phaum mob tuag aws loj kawg. 34 Lawv tis npe rau thaj chaw ntawd hu ua Kis Nplos Has Tas Vas, vim nyob ntawd, lawv faus cov neeg noj nqaij yij tuag. 35 Tsoom pej xeem thiaj tshais chaw ntawm Kis Nplos Has Tas Vas ntawd los rau Has Xes Los. Lawv los tsa tsev nyob Has Xes Los.

Tswv Ntuj teb Mis Lias thiab As Loos. 12 : 1 - 10.

12 1 Mis Lias thiab As Loos nkawd yws yws txog Mais Xes, vim Mais Xes poj niam yog ib tug Kws Xis. 2 Nkawd hais tias : "HUAB TAIS puas hais lus rau Mais Xes ib leeg xwb ? Nws tsis hais lus rau peb thiab lod ?" Ces HUAB TAIS hnov. 3 Mais Xes yog ib tug neeg nyiam ua tus me, yog tus neeg nyiam ua neeg me tshaj txhua leej hauv lub ntiaj teb no. 4 Ib sij huam, HUAB TAIS hais rau Mais Xes, As Loos thiab Mis Lias lawv tias : "Nej peb leeg tuaj tom lub Tsev Tsam Phooj Sib Ntsib." Ces lawv peb leeg mus. 5 HUAB TAIS nrog ib twv huab nqes los nyob ze ntawm lub qhov rooj Tsev Tsam Phooj. Nws hu As Loos thiab Mis Lias nkawd, ces nkawd ob leeg txav mus ze. 6 HUAB TAIS hais tias : "Neb mloog kuv cov lus no : Yog muaj ib tug yaj saub nyob hauv nej, mas kuv cia nws pom kuv nyob hauv npau suav, kuv hais lus rau nws nyob hauv npau suav xwb. 7 Tiam sis kuv tsis ua li ntawd rau kuv tus tub txib Mais Xes, kuv tso tas

nrho kuv lub tsev rau nws saib. 8 Kuv nrog nws hais lus tim ntsej tim muag kiag, kuv hais lus tseeb, tsis ua paj lug hais rau nws, nws tau pom kiag HUAB TAIS tus duab. Vim li cas neb thiaj muaj cuab kav hais lus thuam kuv tus tub txib Mais Xes ?"

9 HUAB TAIS npau taws rau nkawd heev, ces nws rov mus. 10 Twv huab kuj ploj ntawm lub Tsev Tsam Phooj lawm. Ua ciav Mis Lias cia li mob ruas, nws ib ce dawb paug cuag daus. As Loos tig mus ntsia nws, As Loos pom nws twb mob ruas lawm.

As Loos thiab Mais Xes thov Ntuj rau Mis Lias. 12 : 11 - 16.

11 As Loos hais rau Mais Xes tias : "Leej Tij Hlob, thov koj txhob muab txim rau wb qhov txhaum uas wb tsis tau ua zoo xav, wb cia li ua lawm. 12 Thov koj tsis txhob cia nws zoo li ntawd, xws li tus me nyuam tuag hauv nws niam plab, uas thaum nws nchuav tawm los nws tej nqaij twb lwj tas ib nrab lawm !" 13 Ces Mais Xes thiaj thov HUAB TAIS tias : "Tswv Ntuj, Kuv thov koj, koj kho nws kom nws zoo !"

14 HUAB TAIS hais rau Mais Xes tias : "Yog nws txiv nti aub ncaug rau nws ntsej muag no, nws yuav tau ris kev txaj muag xya hnub puas yog ? Ua li mas nej coj nws mus nrauj zoo rau sab yeej nraud kom puv xya hnub, ces nej mam rov qab txais nws los nyob hauv yeej dua."

15 Ces lawv thiaj coj Mis Lias mus nrauj zoo tau xya hnub nyob sab yeej nraud. Haiv neeg tsis sawv kev mus ntxiv, lawv tos nws rov los tso. 16 Lawv mam tso Has Xes Los tseg, lawv tshais chaw mus tsa tsev nyob hauv lub hav suab puam Pas Las.

Lawv mus xyuas Kas Nas Has teb.

13 : 1 - 3 + 25 - 33.

13 1 HUAB TAIS hais cov lus no rau Mais Xes :

2 "Koj xa ib co neeg mus xyuas Kas Nas Has teb, xyuas lub chaws uas kuv muab rau cov His Xas Lais. Koj xa cov thawj coj, ib lub xeem ib tug neeg mus."

3 Ces Mais Xes thiab xa lawv ntawm lub hav suab puam Pas Las mus, raws li HUAB TAIS kom ua. Cov mus yog cov coj tsoom His Xas Lais. 25 Lawv mus xyuas teb chaws tau plaub caug hnub, lawv mam rov qab los txog. 26 Lawv los cuag Mais Xes, As Loos, thiab tsoom His Xas Lais nyob hauv lub hav suab puam Pas Las, hauv Kas Des. Lawv piav rau Mais Xes thiab rau tas tsoom pej xeem mloog. Lawv muab tej qoob loo, tej txiv hmab txiv ntoo uas lawv nqa los rau sawv daws saib.

27 Lawv piav li no :

"Peb mus txog lub teb chaws uas koj xa peb mus. Muaj tseeb tiag, yog ib lub teb chaws uas mis nyuj thiab zib ntab zib mu ntws lug. Peb nqa tej yam no los rau nej saib. 28 Tab sis haiv neeg nyob lub teb chaws ntawd muaj peev xwm kawg, lawv tej nroog loj dav thiab xov ntsa zeb ntsa tsua, peb tau pom As Nav cov xeeb ntxwv. 29 Cov As Mas Les Xis nyob hauv lub xeev Nes Zes sab Naj, cov His Tis, cov Yes Npus Xis, thiab cov As Mos nyob pem roob, hos cov neeg Kas Nas Has nyob raws ntug hiav txwv thiab raws tus ntug dej Yos Las Das."

30 Kas Les txhib tsoom pej xeem uas tuaj sib sau ncig Mais Xes tias :

"Peb yuav tsum sawv kev mus, peb mus ntaus kom tau lub teb chaws : peb muaj peev xwm ua tau xwb."

31 Tiam sis cov txiv neej uas tau nrog

nws mus, teb tias :

"Peb yuav ntaus tsis yeej haiv neeg ntawd li, vim lawv muaj zog dua peb."

32 Ces lawv thuam lub teb chaws uas lawv tau mus xyuas rau cov His Xas Lais, lawv hem tias :

"Lub teb chaws uas peb mus xyuas mas yog ib lub teb chaws noj neeg. Cov neeg peb tau pom yog ib cov neeg siab siab.

33 Peb pom ib co neeg loj loj kawg (yog As Nav cov tub uas lawv yog cov neeg loj loj cov xeeb ntxwv). Peb zoo nkaus li cov kooj nyob ntawm lawv ib sab, lawv los yeej saib peb zoo ib co kooj xwb."

Cov His Xas Lais ntxeev siab.

14 : 1 - 9.

14 1 Ces tas tsoom pej xeem tsa suab nthe zom zaws. Hmo ntawd lawv quaj ib hmos. 2 Tas tsoom His Xas Lais yws yws Mais Xes thiab As Loos nkawd, tas sawv daws hais rau nkawd tias :

"Ua cas peb tsis tuag nyob teb chaws Hais Nkws Tos ! Thiab ua cas peb tsis tuag nyob lub hav suab puam no ! 3 Vim li cas HUAB TAIS thiab yuav coj peb mus nyob lub teb chaws ntawd kom peb raug ntaj tua tuag tas, ces peb tej poj niam me nyuam yuav raug luag yuam yuav tas ? Cia peb rov mus Hais Nkws Tos teb mas zoo dua !"

4 Ces lawv sib hais lawv zom zaws tias : "Peb tsa peb ib tug thawj coj peb, ces peb rov mus Hais Nkws Tos teb."

5 Mais Xes thiab As Loos nkawd thiab pe, ntsej muag ti nkaus av, ntawm tsoom His Xas Lais xub ntiag. 6 Cov uas tau mus xyuas teb chaws los, muaj Yos Xuas uas yog Nuv tus tub, thiab Kas Les, uas yog Yes Fus Nes tus tub, nkawd dua rhe nkawd tej ris tsho. 7 Nkawd hais rau

tsoom His Xas Lais tias :

"Lub teb chaws uas peb tau mus soj los, yog ib lub teb chaws zoo, yog ib lub teb chaws zoo tiag tiag. 8 Yog HUAB TAIS tuaj peb tog, nws yuav ua kom peb mus txeem tau hauv lub teb chaws, thiab nws yuav muab pub rau peb nyob. Yog ib lub teb chaws uas mis nyuj thiab zib ntab zib mu ntws lug tiag. 9 Nej tsis txhob maj npau taws rau HUAB TAIS. Nej tsis txhob ntshai haiv neeg uas nyob txawm hauv lub teb chaws ntawd, vim lawv tsis txaus peb nqos xws li ib lo mov. Lawv cov dab tsis pov hwm lawv lawm. Hos ntawm peb, mas peb muaj HUAB TAIS nrog nraim peb. Nej tsis txhob txhawj li."

HUAB TAIS npau taws. Mais Xes thov Ntuj. 14 : 10 - 24.

10 Tas tsoom His Xas Lais tab tom tham zom zaws tias lawv yuav txawb pob zeb tua Mais Xes, As Loos, Yos Xuas, thiab Kas Les lawv kom tuag. Ces HUAB TAIS lub hwj chim tawm los nyob ntawm lub Tsev Tsam Phooj Sib Ntsib rau cov His Xas Lais pom. 11 HUAB TAIS hais rau Mais Xes tias :

"Haiv neeg no yuav thuam kuv txog thaum twg ? Lawv yuav tsis ntseeg kuv ntev li cas ntxiv ? Txawm kuv tau ua tej Yam hwj huam loj rau lawv pom los lawv tseem tsis ntseeg. 12 Kuv yuav tso ib tug mob aws tuaj tua lawv, kuv yuav rho lub cuab tam ntawm lawv los. Ces kuv yuav coj koj mus tsim ib haiv neeg loj, muaj hwj chim dua lawv."

13 Mais Xes teb HUAB TAIS tias : "Tab sis cov Hais Nkws Tos twb paub lawm tias yog koj lub zog ua kom haiv neeg no tawm hauv lawv lub teb chaws los. 14 Lawv twb qhia cov neeg nyob txawm hauv lub teb chaws no paub tas.

HUAB TAIS, sawv daws twb paub tas tias koj yog tus nrog nraim haiv neeg no nyob. Koj tau ua kom lawv pom koj lub ntsej muag, koj tau los nyob hauv twv huab, nyob saum lawv ; nruab hnub koj nyob hauv ib twv huab mus ua lawv ntej, hmo ntuj koj nyob hauv cov hluav taws. 15 Yog koj ua kom haiv neeg no ib teg tuag nthi, mas cov pej kum haiv neeg uas tau hnov hais txog koj, yuav hais tias : 16 'HUAB TAIS coj tsis tau haiv neeg no mus hauv lub teb chaws uas nws cog lus pub rau lawv nyob, mas nws thiaj muab lawv tua tuag tas nyob hauv teb chaws suab puam.' 17 Koj tsis txhob ua li ntawd, Huab Tais, zaum no koj cia li nthuav koj lub zog loj tawm los ! Raws li koj lo lus hais tias : 18 'HUAB TAIS npau taws qeeb, nws txoj kev hlub dav dav meem mias, nws ua siab ntev nyiaj tej kev tsis zoo kev txhaum. Tiam sis nws yuav tsis pub tus txhaum dim nws lub txim, nws yog tus muab txim rau phaj tub mus txog tiam peb tiam plaub vim phaj txiv tau ua txhaum.'

19 Thov koj zam txhaum rau haiv neeg no, vim koj lub siab loj siab zoo tas nrho, koj ua rau lawv raws li koj tau ua txij puag Hais Nkws Tos teb los txog tav no." 20 HUAB TAIS hais tias :

"Kuv yuav zam rau lawv raws li koj thov. 21 Tiam sis vim kuv yog tus muaj t xoja sia, kuv lub hwj chim nyob puv ntiaj teb, 22 mas cov neeg uas tau pom kuv lub hwj chim thiab cov hwj huam uas kuv tau ua nyob Hais Nkws Tos teb, thiab nyob hauv teb chaws suab puam, tab sis lawv tau sim kuv kaum zaus lawm, tsis kav lawv tseem tsis xav mloog kuv lus, 23 mas lawv yuav tsis pom lub teb chaws uas kuv tau cog lus pub rau lawv cov yawg koob. Cov neeg thuam kuv, tsis muaj ib tug yuav tau pom lub teb chaws

ntawd. 24 Kuv tus tub txib Kas Les, mas nws tsis ntaus tswv yim phen, nws tau mloog kuv lus zoo, kuv yuav ua kom nws tau tsuj lub teb chaws uas nws tau mus xyuas, thiab nws tsoom xeeb ntxwv yuav tau lub teb chaws ua lawv tug."

Kos Les, Das Taas, thiab As Npis Las ntxeev siab.

16 : 1 - 5 + 8 - 11 + 23 - 32.

16 1 Kos Les yog Yi Tshas tub, yog Kes Has xeeb ntxwv thiab Les Vis tsev neeg. Das Taas thiab As Npis Las yog Es Lias tub, thiab Oos uas yog Pes Les tub (Es Lias thiab Pes Les nkawd yog Lus Npees tub), lawv yog neeg muab hlob, tsis txo hwj chim. 2 Lawv nrog ib pab ob puas tsib caug leej thawj coj His Xas Lais muaj koob nto npe sawv tiv Mais Xes. Lawv pab no yog luag rub rau qhov siab, thaum muaj ib yam tseem ceeb. 3 Lawv koom siab cem Mais Xes thiab As Loos nkawd tias : "Neb ua dhau kev cai lawm ! Tas tsoom neeg, txhua leej txhua tus uas nyob hauv lub txoos puav leej yog neeg qee rau HUAB TAIS. HUAB TAIS twb nrog sawv daws nyob. Vim li cas neb thiaj tsa neb siab dua HUAB TAIS haiv neeg huv tib si ?"

4 Mais Xes hnov nws cov lus no, Mais Xes tso cev vau hlo rau hauv av. 5 Ces Mais Xes hais rau Kos Les thiab nws pab neeg tias :

"Tag kis sawv ntxov, HUAB TAIS yuav qhia sawv daws tias leej twg yog nws tug tiag, leej twg yog tus nws xaiv, thiab tus nws yuav cia txav los ze nws. HUAB TAIS cia leej twg txav los ze nws, mas tus ntawd yog tus Huab Tais xaiv."

8 Mais Xes hais rau Kos Les tias : "Les Vis cov tub, nej mloog mog !

9 Puas yog nej xav tias cov His Xas Lais tus Tswv Ntuj pub tsawg dhau rau nej ? HUAB TAIS twb xaiv nej hauv tas tsoom His Xas Lais los ua tub tsob hwb nyob hauv nws lub Tuam Tsev, kom nej sawv tas tsoom neeg chaw coj lub txoos teev Ntuj, qhov no tsis txaus nej thiab lod ? 10 HUAB TAIS tau hu koj mus nyob ze ntawm nws, koj thiab koj cov kwv tij Les Vis tib si. Zaum no, nej tseem xav kom nej tau ua leej choj thiab ! 11 Koj thiab koj pab neeg, nej tau tuav tswv yim tiv HUAB TAIS. As Loos yuav ua tau dab tsi, yog nws ua nws tib leeg kheej xwb ? Ua cas nej thiaj li yws yws txog nws ?"

23 HUAB TAIS hais rau Mais Xes tias :

24 "Koj hais rau tsoom pej xeem tias : 'Nej txav mus deb ntawm Kos Les lub tsev.'"

25 Mais Xes sawv tsees, nws khaiv mus cuag Das Taas thiab As Npis Las nkawd. Cov txwj laus His Xas Lais kuj lawv nws qab mus thiab. 26 Mais Xes hais rau tsoom pej xeem tias :

"Nej sawv daws kaj tsij tawm sai sai mus deb ntawm cov neeg phen no lub tsev tsam phooj. Nej tsis txhob kov ib yam uas yog lawv tug, tsam lawv tej txhaum rub tau nej nrog lawv mus thiab."

27 Ces sawv daws txav mus deb ntawm Kas Les lub tsev. Das Taas thiab As Nplis Las nkawd tawm tuaj nrog nkawd poj niam, nkawd cov tub, thiab cov me nyuam me nyob ntawm qhov rooj tsev ntaub. 28 Mais Xes hais tias :

"Thaum nej pom tej no, nej yuav paub tias yog HUAB TAIS xa kuv tuaj ua tej hauj lwm no, tsis yog kuv lam ua kuv xwb. 29 Yog tias cov neeg ntawd tuag xws li ntiaj teb tib neeg t xo j kev tuag, mas tsis yog HUAB TAIS xa kuv tuaj. 30 Tab sis yog HUAB TAIS ua ib yam

txawv txawv : Yog av txawj rua ncauj nqos cov neeg ntawd, thiab nqos lawv lub cuab tam, kom lawv cia li tuag nyos, mas nej yuav paub tias cov neeg ntawd tau ntxeev siab rau HUAB TAIS lawm."

31 Mais Xes hais cov lus no tas nrho, ces av pib tawg pleb nrnis hauv lawv ko taw, 32 av rua hlo ncauj nqos lawv thiab lawv tsev neeg, nqos Kos Les cov neeg thiab nws lub cuab tam tas huv si.

As Loos tus ceg ntoo.

17 : 21 - 26.

17 21 Mais Xes hais lus rau tas tsoom tu ki His Xas Lais, ces lawv cov thawj coj ib leeg muab ib tug ceg ntoo rau nws, muaj kaum ob tug ceg ntoo taj kaum ob lub xeem. As Loos kuj muaj ib tug ceg ntoo nyob hauv thiab.

22 Mais Xes coj mus tso rau ntawm HUAB TAIS xub ntiag, hauv lub Tsev Tsam Phooj ua Tim Khawv. 23 Tag kis, Mais Xes mus xyuas hauv lub Tsev Tsam Phooj ua Tim Khawv, pom As Loos tus ceg ntoo sawv tsev neeg Les Vis chaw tawg paj, muaj ib co cos paj tab tom nthaw, muaj ib co paj twb tawg nthuav lawm, thiab muaj ib co txiv twb txi siav siav lawm. 24 Mais Xes nqa cov ceg ntoo ntawm HUAB TAIS xub ntiag tib si los, nws coj los rau cov His Xas Lais, lawv mus xyuas thiab nyias muab nyias tus ceg ntoo rov los. 25 Ces HUAB TAIS hais rau Mais Xes tias :

"Koj rov muab As Loos tus ceg ntoo mus tso rau ntawm lub Tsev Tsam Phooj ua Tim Khawv, muaj ib qho chaw cia tus ceg ntoo nyob ntawd, ua ib lub cim rau cov neeg ntxeev siab pom. Ces lawv yuav tsis muaj chaw yws ntxiv rau kuv hnov, mas lawv thiab nyias muab nyias tus ceg ntoo rov los."

26 Mais Xes ua raws li HUAB TAIS

kom nws ua. Nws ua tas ib puas tsav yam li ntawd.

Cov dej Mes Lis Npas.

20 : 1 - 13.

20 1 Lub ib hlis, tsoom tub ki His Xas Lais sawv daws los txog lub teb chaws suab puam Xees. Tsoom pej xeem los tsa tsev nyob Kas Des. Thaum lawv los txog ntawd, ces Mis Lias tuag, lawv muab nws faus rau ntawd.

2 Tsoom neeg sawv daws tsis tau dej haus, ces lawv koom siab tuaj ib tog cem Mais Xes thiab As Loos nkawd. 3 Lawv tuaj cem Mais Xes tias :

"Kheev peb lam nrog peb cov kwv tij tuag thaum HUAB TAIS tuaj rhuav lawv mas ! 4 Vim li cas koj thiaj coj HUAB TAIS haiv neeg los nyob lub suab puam no kom peb thiab peb cov tsiaj tuag tas tib si ? 5 Vim li cas koj thiaj coj peb tawm hauv Hais Nkws Tos teb los nyob lub niag teb chaws qhuav no ? Tsis zoo ua noj ua haus, tsis muaj ntoo txiv cev, tsis muaj hmab txiv cawv, tsis muaj ntoo txiv muaj noob, thiab tsis muaj dej haus li !"

6 Mais Xes thiab As Loos ncaim ntawm cov neeg, nkawd mus nyob ze lub qhov rooj Tsev Tsam Phooj Sib Ntsib. Nkawd pe HUAB TAIS, nkawd tsa suab hlo hais tias :

HUAB TAIS Tswv Ntuj, thoj mloog koj haiv neeg hu txog koj. Thov koj qhib koj cov paj tshab. Thov koj qhib ib lub qhov dej txhawv rau peb haus. Thaum lawv tau dej haus lawd, ces yuav tsis muaj leej twg yws ntixiv."

7 Ces HUAB TAIS lub hwj chim tawm tuaj nyob saum Mais Xes thiab As Loos nkawd. HUAB TAIS hais rau Mais Xes tias :

8 "Koj tuav As Loos tus ceg ntoo, As Loos neb nqua hu tsoom pej kom tuaj nyob ua ke. Ces koj ua rau lawv ntsia ntsoov ntawm lawv qhov muag, koj hais lus rau phab tsua no, ces phab tsua yuav muab dej rau nej sawv daws haus. Thaum koj ua dej txhawv ntawm phab tsua los lawm, koj yuav cia tsoom pej xeem haus, thiab cia lawv cov tsiaj tib si haus."

9 Mais Xes thiaj muab tus ceg ntoo ntawm HUAB TAIS xub ntiag los, raws li HUAB TAIS kom ua. 10 Mais Xes thiab As Loos nkawd hu tas tsoom pej xeem tuaj nyob ntawm phab tsua, ces Mais Xes hais rau lawv tias :

"Cov neeg qig lus, nej mloog mog. Peb puas ua tau kom dej txhawv hauv phab tsua no los rau nej haus ?"

11 Ces Mais Xes tsa nws txhais tes, nws muab tus ceg ntoo nplawm phab tsua ob teg : Dej txhawv ntws lug tawm los, txaus tas tsoom sid thiab lawv cov tsiaj haus pov khawv.

12 HUAB TAIS hais rau Mais Xes thiab As Loos tias :

"Vim neb tsis ntseeg tias kuv muaj peevee xwm ua tau kom cov His Xas Lais pom kuv lub hwj huam ntshiab, mas neb yuav tsis tau coj tsoom neeg ntawd mus tsuj lub teb chaws uas kuv muab rau lawv nyob."

13 Cov dej ntawd hu ua dej Mes Lis Npas, vim nyob ntawd cov His Xas Lais ntkeev siab rau HUAB TAIS, ces HUAB TAIS muab nws lub hwj huam ntshiab rau lawv pom.

Tus nab tooj. 21 : 4 - 9.

21 4 Cov His Xas Lais tso lub Roob Hos tseg, lawv taug txoj kev mus rau lub hiav txwv Xus, vim lawv xav lug

Es Dos teb. Thaum lawv mus txog ib tog kev, tsoom pej xeem npau taws. 5 Lawv cem Tswv Ntuj thiab cem Mais Xes tias : "Vim li cas neb thiaj coj peb tawm Hais Nkws Tos teb kom peb los tuag hauv lub teb chaws suab puam no ? Tsis muaj mov noj, tsis muaj dej haus li, peb dhuav noj cov niag mov tuag tshaib ntawd dhau hwv lawm !"

6 Tswv Ntuj thiaj tso ib cov nab muaj taug tuaj tom lawv. Cov nab ntawd tom cov His Xas Lais tuag coob leej. 7 Tsoom pej xeem mus hais rau Mais Xes tias :

"Peb ua txhaum lawm vim peb tau cem HUAB TAIS thiab cem koj. Koj thov kom HUAB TAIS zam rau peb, kom nws ntiab cov niag nab ntawd khiav mus deb peb."

Ces Mais Xes thiaj thov kom Ntuj zam rau lawv. 8 HUAB TAIS teb tias :

"Koj nchuav ib tug nab muaj taug, koj muab khuam rau saum ib tug ncej. Leej twg raug nab tom, yog nws ntsia tus nab nchuav ntawd ces nws yuav tsis tuag."

9 Mais Xes thiaj muab tooj nchuav ua ib tug nab, nws muab khuam rau saum ib tug ncej. Yog nab tom leej twg, mas nws tsa muag ntsia tus nab tooj ntawd ces nws tsis tuag.

Tus vaj Muas hu Npas Las Has.

22 : 1 - 6 + 12 - 21.

22 1 Ces cov tub ki His Xas Lais mus ntxiv, lawv mus tsa tsev nyob hauv lub tiaj nqeeb Muas, nyob sab dej Yos Las Das tim ub, ncaj rau lub tsheej Yes Lis Kos. 2 Npas Las, uas yog Xis Pos tub, paub tas puas tsav yam uas cov His Xas Lais ua rau cov As Mos. 3 Ces tas teb chaws Muas ntshai lawv, vim lawv coob heev. Teb chaws Muas

ntshai cov His Xas Lais. 4 Tus vaj hais rau cov txwj laus Mas Dias tias :

"Saib pab neeg coob coob ntawd tab tom tuaj noj teb noj chaw ncig peb xws li nyuj noj zaub hauv tej teb."

Lub zim txwv ntawd, Npas Las uas yog Xis Pos tub, ua vaj kav cov Muas. 5 Tus vaj Npas Las xa neeg mus hu Npas Las Has, uas yog Npes Os tub, nyob Pes Tos, ze tus Niam Dej, hauv lub teb chaws As Mas Vas. Nws tso xov hais tias :

"Haiv neeg ntawd khaiv Hais Nkws Tos teb los, lawv los nyob puv lub teb chaws lawm ; lawv los ua zos nyob ze ze kuv. 6 Kuv thov koj tuaj ntawm no, koj tuaj foom lus phem rau lawv, vim lawv muaj zog dua kuv. Yog koj tuaj foom lawv, mas peb thiaj li yuav ntaus yeej lawv thiab yuav ntiab tau lawv tawm hauv lub teb chaws no mus. Vim kuv paub tias : koj foom hmoov zoo rau leej twg mas nws yeej tau qhov zoo, koj foom phem rau leej twg mas nws yeej tau qhov phem."

12 Tswv Ntuj hais rau Npas Las Has tia : "Koj tsis txhob nrog cov neeg ntawd mus. Koj tsis txhob foom hmoov phem rau haiv neeg tod, vim lawv yog ib haiv neeg Ntuj foom hmoov zoo rau lawm.

13 Thaum kaj ntug, Npas Las Has sawv los, nws hais rau cov txwj laus uas Npas Las tso tuaj hais tias :

"Nej rov mus nej lub teb chaws, nej mus nej xwb, vim HUAB TAIS tsis pub kuv nrog nej mus."

14 Cov txwj laus Muas thiaj sawv kev rov qab, lawv los cuag Npas Las, lawv hais rau nws tias :

"Npas Las Has tsis kam nrog peb tuaj."

15 Npas Las rov xa ib pab neeg coob dua thiab muaj hwj chim dua thawj pab tuaj.

16 Lawv mus cuag Npas Las Has dua, lawv hais rau nws tias :

"Npas Las uas yog Xis Pos tub hais li no : Thov koj tsis txhob yig, koj cia li tuaj kom txog kuv. 17 Kuv muab koj saib rau saum lub sam xeeb, yog koj hais dab tsi mas kuv yuav ua tas tib si. Thov koj tuaj foom hmoov phem rau haiv neeg ntawd."

18 Npas Las Has teb rau cov tuaj ntawd tias :

"Tab txawm Npas Las muab nyiaj muab kub puv nws lub tsev rau kuv, los kuv hla tsis tau kuv tus HUAB TAIS Tswv Ntuj lo lus, txawm tias ua ib yam me, los ib yam loj, kuv hla tsis tau li. 19 Hmo no nej pw ntawm no, tag kis mas kuv thiaj paub tias HUAB TAIS yuav hais dab tsi rau kuv ntxiv."

20 Hmo ntuj, Tswv Ntuj hais rau Npas Las Has tias :

"Vim tias cov neeg ntawd tuaj hu koj mus, mas koj cia li sawv, koj nrog lawv mus. Tab sis koj yuav ua raws li kuv kom koj ua xwb."

21 Thaum kaj ntug, Npas Las Has sawv, nws nog nws tus maum luj, ces nws nrog cov txwj laug Muas mus.

Npas Las Has tus maum luj.

22 : 22 - 35.

22 Npas Las Has nrog lawv mus, ces HUAB TAIS npau taws, HUAB TAIS tus Tshiab tuaj sawv thaiv nws kev. Nws caij nws tus maum luj mus, nws ob tug tub kuj nrog nws mus. 23 Tus maum luj pom HUAB TAIS tus Tshiab sawv hauv plawv kev, tuav rab ntaj ntawm tes; tus maum luj lug kev hauv cov teb mus, tiam sis Npas Las Has nplawm maum luj kom rov los taug kev. 24 HUAB TAIS tus Tshiab mus tos dua ib ntus uas txoj kev ti ti hla ib cov vaj txiv cawv, muaj ob lub laj kab nyob sab xis thiab nyob sab laug. 25 Maum luj pom HUAB TAIS tus

Tshiab, ces maum luj mus ti ti lub laj kab, Npas Las Has txhais taw txhuam laj kab, Npas Las Has rov muab maum luj nplawm dua. 26 HUAB TAIS tus Tshiab hloov chaw, nws mus nyob ntawm ib qho nqaim nqaim, tsis muaj chaw mus sab xis los sab laug li. 27 Maum luj pom HUAB TAIS tus Tshiab, maum luj txawm cia li pw hauv av lawm. Npas Las Has npau taws ceev ceev, nws muab pas ob peb nlpawg maum luj. 28 Ces HUAB TAIS qhib maum luj qhov ncauj kom txawj hais lus, maum luj hais rau nws tias : "Kuv tau ua dab tsi rau koj, koj thiaj muab kuv ntaus peb zaug li no ?" 29 Npas Las Has teb maum luj tias : "Vim koj ua saib tsis taus kuv ! Yog kuv muaj ib rab ntaj ntawm tes, mas kuv twb muab koj tua pov tseg lawm !" 30 Maum luj hais rau Npas Las Has tias : "Kuv puas yog koj tus maum luj ib txwm thauj koj txog hnub no ? Kuv puas niaj zaus ua li no rau koj ?" Npas Las Has teb tias : "Koj ua tsis ua." 31 Ces HUAB TAIS qhib Npas Las Has qhov muag. Nws pom HUAB TAIS tus Tshiab sawv ntawm txoj kev, tuav rawv rab ntaj ntawm tes. 32 HUAB TAIS tus Tshiab hais rau nws tias : "Vim li cas koj thiaj ntaus koj tus maum luj peb zaug li ntawd ? Yog kuv tuaj sawv thaiv koj txoj hauv kev, thaum kuv thaiv ces koj tsis muaj kev mus lawm. 33 Koj tus maum luj pom kuv, ces nws thiaj tau lug kev peb zaug. Koj hmoov zoo kawg nws tau lug kev, tsis li ntawd ces kuv twb muab koj tua lawm, tab sis kuv txuag nws txoj sia." 34 Npas Las Has teb rau HUAB TAIS tus Tshiab tias : "Kuv ua txhaum lawm. Vim kuv tsis paub tias koj nyob ntawm kev thaiv kuv

hauv ntej. Zaum no, yog tias koj tsis txaus siab, kuv mam rov qab mus tsev." 35 HUAB TAIS tus Tshiab hais rau Npas Las Has tias : "Koj nrrog cov neeg ntawd mus kuj tau. Tab sis koj tsis txhob hais ib los tshaj qhov kuv yuav qhia koj hais." Ces Npas Las Has nrog cov txwj laus uas Npas Las xa mus ntxiv.

Npas Las Has foom hmoov zoo rau cov His Xas Lais peb zaug.

23 : 1 - 14 + 18 - 30; 24 : 1 - 7 + 17.

23 1 Npas Las Has hais rau Npas Las tias :

"Koj tsa xya lub thaj txi Ntuj rau ntawm no, thiab koj coj xya tus heev nyuj thiab xya tus laug yaj tuaj rau kuv."

2 Npas Las ua raws nraim li Npas Las Has hais, nws coj ib tug heev nyuj thiab ib tug txiv yaj tuaj hlawv txi Ntuj rau saum txhua lub thaj. 3 Ces Npas Las Has hais rau Npas Las tias :

"Koj sawv ntsug twj ywm ntawm koj cov tsiaj hlawv txi Ntuj, hos kuv yuav mus kuv ib qho. Tej zaum HUAB TAIS yuav tuaj ntsib kuv. HUAB TAIS ua kom kuv pom dab tsi, kuv mam qhia koj paub."

Ces Npas Las Has mus nyob saum ib lub pov roob do do. 4 Tswv Ntuj tuaj ntsib Npas Las Has, Npas Las Has hais tias :

"Kuv npaj tau xya lub thaj txi Ntuj thiab kuv tau hlawv ib tug heev nyuj thiab ib tug laug yaj rau saum txhua lub thaj."

5 Ces HUAB TAIS tso ib lo lus rau hauv Npas Las Has qhov ncauj tas, nws hais tias :

"Koj rov qab mus ntawm Npas Las, koj yuav hais cov lus ntawd ."

6 Ces Npas Las Has rov los ntawm Npas Las. Nws pom Npas Las tseem sawv ntsug ntawm nws cov tsiaj txi Ntuj, thiab

tas cov txwj laus Muas kuj nrog nws sawv ntawd. 7 Ces Npas Las Has thiaj hais nws zaj lus paj huam tias:

"Npas Las hu kuv tuaj As Las teb tuaj, tus vaj Muas nyob saum cov pov roob Kes Des hu tias :

'Koj tuaj pab kuv foom lus phem rau Yas Kos tsev neeg, koj tuaj tsawm His Xas Lais.'

8 Kuv yuav foom lus phem li cas, yog tias Tswv Ntuj tsis foom phem ? Kuv

yuav foom lus tsis zoo li cas, yog tias Tswv Ntuj tsis foom lus tsis zoo ?

9 Kuv pom tseeb tiag, kuv nyob saum hauv tsua ntsia pom, kuv nyob saum ncov roob ntsia ntsoov.

Kuv pom ib haiv neeg ua neej nyob ib cag. Haiv neeg ntawd tsis nrog tsoom kuj cuab nyob sib xyaws.

10 Leej twg yuav suav tau Yas Kos tsev neeg uas coob npaum li hmoov av ? Leej twg yuav suav tau ib feem plaub ntawm cov His Xas Lais ? Kheev lam kuv tus plig txawj tuag raws li cov neeg ncaj ! Kheev kuv lam muaj ib txog hmoov zoo li lawv ! 11 Npas Las hais rau Npas Las Has tias :

"Koj ua dab tsi li ko rau kuv ? Kuv thov koj tuaj foom hmoov phem rau kuv cov yeeb ncuab, ua cas koj foom lus zoo rau lawv ?"

12 Npas Las Has hais ntxiv tias :

"Kuv yuav tsum hais raws li cov lus HUAB TAIS muab rau kuv hais xwb."

13 Npas Las hais rau nws tias :

"Koj nrog kuv mus nyob lwm qhov chaw ntsia. Haiv neeg uas koj tuaj ntawm no ntsia pom, koj tsuas pom me me xwb, koj pom tsis tas. Koj mam nyob nrad foom lus phem rau lawv."

14 Npas Las coj nws mus saum daim teb Zov Hmo nyob saum lub ncov roob Pis Nkas. Nws kuj mus tsa xya lub thaj txi

Ntuj rau saud thiab hlawv ib tug nyuj thiab ib tug yaj rau saum ib lub thaj.

18 Ces Npas Las Has hais nws zaj lus paj huam tias :

Npas Las, koj sawv los mloog mog, Xis Pos tus tub, koj tig ntsej los mloog.

19 Tswv Ntuj tsis yog tib neeg, nws tsis dag, nws tsis yog tib neeg tub, nws tsis thim nws lo lus. Nws tsis yog tus uas hais tas, tab sis tsis ua raws, qhia tas tab sis tsis ua raws.

20 Ntuj txib kuv kom foom lus zoo, mas kuv yuav foom zoo, kuv thim tsis tau kuv cov lus.

21 Kuv tsis pom ib qho txhaum nyob hauv Yas Kos lub tsev, los ib qho phem nyob hauv cov His Xas Lais. HUAB TAIS, lawv tus Tswv Ntuj, nrog nraim lawv. Lawv qw ntsuag qees cav txog nws ua lawv tus vaj. 22 Tswv Ntuj coj lawv tawm Hais Nkws Tos teb los. Tswv Ntuj yog zoo tus phaw twm quas cov kub nrau neeg thaiiv lawv.

23 Tsis muaj khawv koob nyob hauv Yas Kos, tsis muaj dab nyob hauv His Xas Lais. Thaum txog sij hawm, luag yuav hais rau Yas Kos thiab His Xas Lais tias : 'Tswv Ntuj yuav ua dab tsi ?' 24 Lawv yog ib haiv neeg uas sawv tsees xws li tus maum tsov tsiv tsiv, tawm plaws los xws li tsov ntxhuav : yog lawv tsis tau noj tus tsiaj uas lawv tom, thiab tsis tau haus nws cov ntshav, mas lawv tsis pw."

25 Npas Las hais rau Npas Las Has tias : "Koj foom tsis tau lus phem rau lawv los cia li, tiam sis koj txhob foom hmoov zoo rau lawv mas !"

26 Npas Las Has teb Npas Las tias : "Kuv tsis tau hais rau koj los ? Kuv twb hais tias : Kuv yuav tsum ua tas puas tsav yam uas HUAB TAIS hais kom ua."

27 Npas Las hais rau Npas Las Has tias : "Mus, kuv coj koj mus nyob lwm qhov

chaw. Tej zaum nyob ntawd, Tswv Ntuj ho yuav pom zoo foom hmoov phem rau lawv."

28 Npas Las coj Npas Las Has mus txog saum lub ncov roob Pes Os, uas sawv siab tshaj cov nyob teb chaws suab puam.

29 Npas Las Has hais rau Npas Las tias : "Koj tsa xya lub thaj txi Ntuj nyob ntawm no, thiab koj coj xya tus nyuj thiab xya tus yaj tuaj rau kuv."

30 Npas Las ua raws li Npas Las Has hais : nyob saum ib lub thaj, nws hlaww ib tug nyuj thiab ib tug yaj txi Ntuj.

24 1 Npas Las Has pom tias HUAB

TAIS pom zoo kom foom hmoov zoo rau His Xas Lais. Nws tsis mus nyob lwm qhov chaw mloog Tswv Ntuj hais lus xws li thawj ob zaug lawm, nws tig ntsej muag mus rau lub hav suab puam.

2 Nws tsa muag ntsia, nws pom cov His Xas Lais nyob ua tej pawg, raws lawv cov xeem. Tswv Ntuj lub tswv yim los nyob hauv nws, 3 ces nws hais nws cov lus paj huam li no :

"Npas Las Has, uas yog Npes Os tub, nws tshaj nws cov lus.

Tus uas pom tau hauv neeg nruab siab tshaj nws cov lus,

4 tus mloog Tswv Ntuj hais, tshaj nws cov lus. Nws pom raws li Sas Dais pub nws pom, nws hnov Tswv Ntuj lo lus teb, ces nws qhov muag qhib los."

5 Yas Kos, koj cov tsev tsam phooj zoo tis ua zoo,

His Xas Lais, koj tej tsev nyob zoo saib tas npaud !

6 Zoo cuag li tej lub tiaj dav, cuag li tej lub vaj ntsuab xiab ntawm ntug dej, zoo cuag li tej hav tshuaj uas HUAB TAIS cog cia, zoo nkauj puav tam li cov ntoo ciab loj siab uas txawm nyob ze dej !

7 Muaj ib tug thawj sawv hauv koj

tsoom xeeb ntxwv los, nws yuav kav ntau haiv ntau xeem neeg . Koj tus vaj loj dua vaj As Nkas, nws lub hwj chim hlob zui zus lawm.

17 Kuv pom His Xas Lais tus Vaj, tab sis nws tseem tsis tau ua vaj tam sis no, kuv pom nws, tab sis nws tsis nyob ze : Ib lub hnub qub sawv hauv Yas Kos tuaj, ib rab cwj ua vaj sawv hauv His Xas Lais los. Nws ntaus cov Muas ob sab ntsos, nws tsoo Xes cov tub taub hau tawg tas.

Cov His Xas Lais teev dab nyob Pes Os. 25 : 1 - 9.

25 1 Cov His Xas Lais mus nyob Sis Tis.

Thaum lawv nyob ntawd, lawv mus nrog cov ntxhais Muas ua dev ua npua.

2 Cov ntxhais coj lawv mus txi cov dab Muas. Ces tsoom pej xeem mus nrog lawv noj cov txim txi dab thiab nrog lawv pe cov dab Muas. 3 Cov His Xas Lais ua txhaum, vim lawv teev tus dab Npas Has nyob Pes Os li ntawd. HUAB TAIS npau taws rau lawv. 4 HUAB TAIS hais rau Mais Xes tias :

"Koj muab cov hau zos coj tsoom pej xeem tua, koj xuas pas chob lawv ziab tshav ntxeet tiaj rau lub hnub ntsia. Koj ua qhov ntawd rau HUAB TAIS, ces HUAB TAIS yuav tsis npau taws rau cov His Xas Lais."

5 Mais Xes hais rau cov txwj laus txiav txim His Xas Lais tias :

"Nej nyias yuav tsum muab nyias cov neeg uas tau mus teev dab Npas Has nyob Pes Os tua pov tseg."

6 Thaum ntawd, muaj ib tug txiv neej His Xas Lais coj tau ib tug poj niam Mas Dias los txog ntawm nws cov kwv tij.

Mais Xes ntsia ntsoov nkawd los, thiab tas tsoom His Xas Lais uas quaj zom

zaws ntawm lub qhov rooj Tsev Tsam
Phooj Sib Ntsib puav leej pom tib si.
7 Thaum pom li ntawd, Pis Has uas yog
Es Les Ntxas tub, yog tus leej choj As
Loos xeeb ntxwv, sawv tsees hauv tsoom
neeg los, nws nthos nkaus ib rab hmuv,
8 raws nkawd qab mus hauv txaj, nws
nkaug nkawd plab mog, nkaug tus txiv
neej His Xas Lais thiab tus poj niam.
Cov His Xas Lais thiaj li tso lawv txoj
kev phem pov tseg. 9 Nees nkaum
plaub txhiab leej His Xas Lais tuag tas
vim txoj kev phem ntawd.

Cov tsheej cia ua chaw cawm siav.
35 : 9 - 16.

35 9 HUAB TAIS hais cov lus no
rau Mais Xes :
10 "Koj hais rau cov His Xas Lais tias :
Thaum nej hla Dej Yos Las Das mus txog
Kas Nas Has teb lawm, 11 mas nej yuav
pom ntau lub tsheej. Nej yuav xaiv ib co

tsheej cia ua tsheej cawm siav rau cov
tua neeg uas lawv tua yuam kev, tsis yog
txhob txwm tua, kom lawv tau chaw
khiav nkaum. 12 Cov tsheej ntawd yuav
ua chaw cawm nej txoj sia, nej thiaj yuav
dim ntawm tus rob caub pauj ntshav. Nej
ua li ntawd kom tus tua yuam kev tsis
txhob xub tuag ua ntej zej zog txiav txim
rau nws.

13 Nej yuav muab rau lub tsheej tshwj
tseg cia ua tsheej cawm siav.

14 Peb lub nyob sab dej Yos Las Das
tim ub, hos peb lub nyob hauv Kas Nas
Has teb yuav ua chaw cawm siav rau nej.

15 Rau lub tsheej ntawd yuav ua chaw
cawm siav rau nej, rau cov pej kum neeg,
thiab cov qhua uas tuaj nyob hauv nej huv
tib si, kom tus uas tua yuam kev ib tug
neeg tau kev khiav mus cawm nws txoj
sia. 16 Yog tus tua neeg ntawd tau xuas
hlau ntaus luag kom tuag, mas nws yog ib
tug txhob txwm tua neeg . Tus neeg tua
neeg yuav tsum tuag.